



T 4664.7/4802

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
MAR 25 1940





皇明名臣經濟錄卷之十四

哈佛大學漢和  
圖書館珍藏印

新安黃訓集

新安汪雲程校

內閣

題內降疏

徐溥

前日欽蒙 發下揭帖一紙內開欽天監致仕監  
正李華令臣等擬 旨着復職管事臣等看得李  
華係傳奉官禮部叅奏行事乖謬致仕况已年老  
今一旦無上事忽然傳出着復職管事未免驚駭  
衆聽且

皇上登極以來凡百除授陞遷俱是合于衙門題  
奏請 旨未有自內傳出者今又輒開其端誠恐  
奔兢干請之徒紛然而起後來難以止塞其於治  
道不無有損若李華果於選擇昌國公張巖葬地  
與有勞力亦當工完之日量與賞賜爲宜况本監  
見有監正吳昊掌印一衙而設兩正官亦爲繁冗  
臣等叨承 朝廷委任一事不敢阿從勿曰君子  
作事謀始盖凡事謀於其始則易爲力倖門一開  
則引例希求者無所不至矣臣等愚見如此伏乞  
聖明採納不勝幸甚

李東陽年譜錄

時有 旨免日講公等上疏曰 經筵日講皆  
祖宗朝良法美意所在而日講尤切謂之日講者  
盖逐日之義欲其工夫接續義理貫通以爲政令  
之法程治化之根本也今天氣和煖正是講學之  
時臣面受

先帝顧命惓惓以常請讀書爲諭追思及此涕淚  
滿襟惟欲少效微勞以圖補報若不昧死懇請則  
負 先帝顧託之隆孤

皇上倚毗之重罪當萬死無以自逭矣

上未報五月 上復不豫數日平復 視朝公等  
上疏曰臣等備員保傅叨寄腹心論道輔德臣之  
職也安上保邦臣之願也先於三月二十四日恭  
聞 聖體違和暫免朝參數日近於五月十三日  
又聞 聖體欠安臣等神菟飛越寢食不寧大馬  
私情莫知所措再經數日乃得瞻拜 天顏不勝  
欣躍而喜幸之極轉生憂懼謹昧死上陳仰惟  
皇上英資洞達聖性剛明直可超邁百王齊光  
列聖但恐天時地利偶失其宜倉卒之間慮所不  
及蓋自端陽前後金鼓炮火之聲徹于都邑廐牧

圍役之徒充于 宮禁此皆衆耳衆目所共聞見  
大臣畏忌而不敢諫小臣震懾而不敢言臣等若  
再緘口括囊旁觀坐視則

祖宗分職以設官朝廷縻祿以養士亦將焉用之  
哉昔漢司馬相如諫擊熊豕以爲遇逸材之馱駭  
不存之地輿不及還轅人不暇施巧雖萬全而無  
患非 天子之所宜近也張猛諫御樓舡以爲乘  
舡危從橋安聖王不乘危史冊書之皆稱美事臣  
等不能親侍 輦轂又不能先事格心前日之事  
萬有一失臣等分固當死死而有知何以見

先帝之面乎幸賴 廟社神靈天心仁愛  
聖躬康復國祚隆長此正

聖心感悟之機天下蒼生之福也伏望

皇上念萬乘之尊思萬幾之重體萬民仰戴之切

為萬代悠久之圖視朝加早則炎暑不侵進膳有

時則元氣日盛于以導迎和氣坐致太平推之天

下人民無不得其所者則 大廷奏事不過數刻

之勤而燕處深宮自有無窮之樂矣

聖旨卿等說的是皆為天下社稷臣民朕已知了

急皇儲疏

李東陽

臣等備員輔導叨任三孤或膺受 顧命或荷蒙

簡任瘝官竊祿積有歲時徒抱朴忠畧無寸補深

慮過計寢食靡寧近日以來恭遇

陛下洞啓 聖心勵精新政大奸已去群弊漸消

孝理方隆仁恩誕布天下之人欣欣相告皆以為

太平之治可指日而致也但事有關於 國家社

稷至重至大者臣等若知而不言言而不盡則是

緘默容身因循誤 國生無以報

陛下知人之鑒死無以見

先帝在天之靈所謂 顧命者為虛名而輔導者

皆餘事也臣等竊惟天下者

祖宗之天下上天之所付託生民之所仰賴昔

太祖高皇帝擲風沐雨十餘年而後得早作夜思

三十餘年而後定何其勞也

太祖文皇帝南征北伐定鼎貽謀亦二十餘年而後成何其難也

列聖相承兢兢業業罔有怠荒以致今日

先帝顧命惟欲

陛下早嗣大位早成大婚光前裕後衍無疆之作聖慮所及亦何其深且遠也四五年間

陛下春秋鼎盛而儲嗣未聞中外臣民傾耳拭目以俟前星之耀此臣等所以憂懼也伏望

陛下念上天付託之隆思

祖宗授受之重體生民仰賴之切每于朝奏講

讀之暇安處宮闈溥施恩澤起居以節游豫以時

保養天和培植國本則六氣不能侵百邪莫敢

近皇儲早立寶祚延長可以隆我國家萬年

之業矣未報

諫調邊軍入衛

李東陽

有獻密計者託言京軍不習戰陣欲調宣府邊軍

三千入衛 京師而以京軍充數戍邊每歲春秋  
番換如班操例

上遣司禮監谷大用同至閣議公力辨以爲不可  
大用等謂此事非我輩所爲自有先入之言牢不  
可破盍姑試之以俟再議公曰某等職在論思預  
聞 國計知其不可若勉強曲從卽有後患獻計  
者不知何在而執筆者固存國事一壞雖死何贖  
往返再日乃具揭帖畧陳其故曰宣府 京師北  
門切見胡虜十分緊要

朝廷屯宿鎮兵分地防守尚恐不給每年河南等

處官軍輪班備禦近因劉賊猖獗動調官軍乃是  
一時權宜亦非得已况今正是防冬時月縱使京  
軍在彼徒爲勞擾亦難濟事

祖宗百餘年來未嘗有此恐傳聞四遠未免驚疑  
臣等不敢輕議如謂

聖駕着牲在邇欲比常加意竊見總兵卻未見在  
滄州宜令兵部密地行文暫帶領邊軍近京住劄  
事畢之日仍令還鎮庶事體穩當人心安靖乃下  
兵部會議兵部始以爲可行及聞閣議及衆論多  
未協者覆議至再皆云不可而 內意已定司禮



監文書迫令擬票去

上坐乾清宮門必欲今夜批出公等乃具題本極言其不便曰京邊官軍各有分地必有急事乃可互相應援今無事而動一不便也京軍備邊不習戰陣難保必勝恐損國威二不便也京軍出京駭人耳目傳聞各處未免驚疑三不便也京軍出外倚恃強勢占住房屋索要錢物需索酒食強買貨物奸污婦女將官護短而不肯禁邊方受害而不敢言四不便也邊軍在內狎恩恃愛傲睨軍民蔑視官府小則怠玩大則違法治之則或不能堪

縱之則愈不可制五不便也違遠鄉井拋棄骨肉或風氣寒煖之不相宜或盤費供給之不相續六不便也糧草之外必用行糧布花之外必須賞賚非緊急不得已之時爲糜費無紀極之計七不便也往來交替無有寧息倉卒之際或變起於道途厭倦之餘或患生於肘腋八不便也示京營之空虛見中國之單弱九不便也西北諸邊見報聲息唇齒之地正須策應脫有踈失咎將誰歸十不便也凡此一事不便者有此數端今五府以爲不便大部等處衙門以爲不便六科十三道皆以爲不

便臣等以腹心之臣居輔導之地若阿諛委順強  
勉曲從是滿朝之臣皆有爲國之心而臣等  
獨當誤國之罪萬死不能以塞責矣伏望  
聖明洞察博採人言稍俟從容務求至當實  
宗社無疆之福也所有前項事情臣等不敢別議  
嘉靖登極詔草 楊廷和

奉

天承運

皇帝詔曰朕承皇天之眷命賴列聖之洪休奉慈壽皇太后之懿旨皇兄大

行皇帝之遺詔屬以倫序入奉宗祧内外文武  
群臣及耆老軍民合辭勸進至于再三辭拒弗獲  
謹于四月二十二日祇告天地宗廟社稷卽皇帝位深思付託之重實  
切兢業之懷惟我

皇兄大行皇帝運撫盈成業承熙洽勵精雖切化  
理未孚中遭權奸曲爲蒙蔽潛弄政柄大播凶威  
朕昔在藩邸之時已知非皇兄之意茲欲興道致治必當革故鼎新事皆率  
由乎舊章亦以敬承夫

經海錄卷之四  
先志自惟涼德方在冲年尚賴親賢共圖新治其  
以明年爲嘉靖元年大赦天下與民更始所有合  
行事宜條列于後

一自正德十六年四月二十二日昧爽以前官吏  
軍民人等有犯除謀反逆叛子孫謀殺祖父母  
父母妻妾殺夫奴婢殺家長殺一家非死罪三  
人採生折割謀殺蠱毒魘魅毒藥殺人強盜妖  
言奸黨失機并事干邊方夷情及人命至死罪  
者不赦外其餘已發覺未發覺已結正未結正  
罪無大小咸赦除之有以赦前事相告言者以

其罪罪之

一弘治十八年五月十八日以後正德十六年四  
月二十二日以前在京在外內外大小官員人  
等有因忠直諫諍及守正被害去任降調陞改  
充軍爲民等項及言事忤旨自陳致仕養病等  
項各該衙門備查明白開具事情奏請定奪死  
忠者諭祭修墳廕敘降調陞改致仕養病閒住  
充軍爲民者起復原職酌量陞用大臣量進階  
級并與應得恩廕人夫月米相應起用者有缺  
推用已故者加贈

一正德十四年文武官員人等爲因諫止巡游跪門責打降級改除爲民充軍等項該部具奏起取復職酌量陞用被打死者情尤可憫各追贈諭祭仍廕其一子入監讀書內有充軍故絕者一體追贈諭祭查訪親屬量與優養

一王府冊封朝廷大禮今後該部務照舊制一年一次舉行

一各處王府應得祿米有缺少者各該巡撫都御史督率所屬查催完納

一各處郡王將軍府子女有應請名請封選婚者本府卽與保勘奏請承奉長史等官不許刁蹬其有年已長成未曾婚配貧難無力者所在官司量爲助給

一各處郡王將軍中尉有因事革減祿米者除毆殺人命敗倫傷化外其餘自詔書到日爲始俱照舊支給儀賓有因成婚年遠不曾赴京謝恩參奏者悉皆宥免

一自正德元年以來諸色人等傳陞乞陞大小官職盡行裁革吏禮兵工四部各將查革過傳陞乞陞文武僧道匠藝官員名數類奏查考其皇

親及公主所生子孫原無出身正途朝廷推恩  
陞授者不在此例

一兩京五府見任掌印僉書管軍管事公侯伯都  
督及都指揮六部等衙門見任文職四品以上  
官并各處巡撫官俱聽自陳去留取自上裁武  
職內有傳旨管事者革去管事照舊帶俸文職  
五品以下兩京吏部照例會官考察

一內府各衙門見任官員有侍從年久供事勤勞  
願告優閑者許各具本陳請取旨定奪

一給事中御史職當言路今後凡朝廷政事得失

天下軍民利病許直言無隱文武官員有貪暴  
奸邪者務要指陳實跡糾劾在外從巡按御史  
糾劾

一官吏軍民人等犯罪自正德九年正月二十八  
日以後已問結立功哨瞭運灰運炭運磚運石  
做工納米納料納鈔擺站煎鹽炒鐵充儀從軍  
伴膳夫及罰班重歷拘役枷號等項悉皆放免  
中間若係行止有虧敗倫傷化例該帶俸差操  
革職爲民者仍各照例發落

一武職官降級調衛者除失機事干邊情不宥外

其餘俱復職回衛內原係錦衣衛調在京別衛  
文職網錯并公事註誤降級者復原職內原係  
京官者對品別用其因事革罷爲民者除事干  
行止有虧敗倫傷化外悉與冠帶閑住原係冠  
帶閑住及京官調外任致仕者各照原職致仕  
一各處武職有因私役軍人不及五名例前問擬  
降級者守邊失誤被賊搶擄人民不及五名情  
輕律重降級者俱復還原職其各邊軍人因失  
事饒免發遣常川守哨者亦免守哨  
一正德十五年十二月以前各處實徵稅糧馬草

農桑人丁絲絹布疋絲綿花絨屯田皇莊莊田  
子粒牧馬草場子粒租銀及甲丁二庫蠟茶銅  
漆銀硃鹽課厨料戶口食鹽猪羊雞鵝備用孳  
生馬驛山廠柴夫後府柴炭軍器沿河軍衛有  
司蘆葦芟草夫價及閘埧泉溜淇淺等夫并椿  
草等料及曠役等項銀兩一應歲派歲辦奏派  
但係該納官錢糧物件拖欠未徵者盡數蠲免  
以甦民困已徵在官該起解者照舊起解准作  
本戶以後年分該納之數各造冊奏繳查考敢  
有將已徵捏作未徵侵欺盜用者許諸人首告

巡撫巡按及守巡司官察訪拿問重治造冊官吏參奏提問戶工二部差去催徵官員即日回京

一浙江等十三布政司并南北直隸嘉靖元年分內除漕運糧斛四百萬石照舊徵兌起運其餘夏秋稅糧馬草農桑人丁絲絹布疋絲綿花絨屯田皇莊莊田子粒牧馬草場子粒租銀及甲丁二庫蠟茶銅漆銀硃等料不分存留起運以十分爲率俱免五分以甦民困

一京通二倉水次倉皇城各門京城九門各馬房倉場各皇莊等處但係正德年間額外多添內臣司禮監照弘治初年例查奏取回

一近年差出取佛買辦織造燒造等項及腹裏地方并各邊各關但係正德年間新添分守守備內臣詔書到日即便回京其各處分守守備內臣將官有正德元年以後黃緣改作鎮守分守及副摠兵等項名色并分外多管地方加添責任者兵部俱查奏改正換給勅書

一自正德年來兩京各衛所容令無藉之徒冒籍投充并新添旗軍校尉勇士力士軍匠并內府

各監局招收軍匠等役辦納官錢私役占用不  
下八九萬餘歲支錢糧百萬餘石以致京儲虧  
耗歲用不繼關係非輕論法都當拿問追究但  
既遇赦姑容改正詔書一出但係正德年間冒  
籍投充并新添及私自頂補額外招收等項人  
役并有名無人該衛所官按月支糧包辦月錢  
者即便各回原衛原籍隨住當差該衛所即將  
名伍開除回報戶部具數奏聞敢有捏奏存留  
設計影射仍前冒支官糧者事發都押發遼東  
鐵嶺衛永遠充軍該衛所官吏拿問調煙瘴地

### 面安置

一騰驤左等四衛勇士除弘治十八年兵部并科  
道官查出見役正數并事故外其餘詭冒名籍  
未經裁革仍又夤緣回衛虛掛名額者各照原  
擬舍餘發原衛民丁發在京缺軍衛分各充軍  
役食糧差操以後勇士替補照例開送兵部驗  
軍官處驗過方許收糧

一權勢中鹽侵奪民利并客商中鹽增價轉賣俱  
問罪入官律有明禁近年以來奸商投託勢要  
每遇開中盡數包占轉賣取利甚至奏開殘鹽



減價中支每米一石支塩四引任場買補夾帶私塩阻滯正課以致塩法大壞邊儲告乏罪雖宥免塩當追沒詔書到日巡塩御史并各運司官即便查訪塩糧勘合內坐到已支未掣并未派未支塩課但係商人投托勢要詭名占中賣窩買窩及河東運司塩課例該宣府中納被勢要奏討賣窩別處開中并奏開殘塩減價報中者悉照大明律裁革入官不許放掣派支敢有將勢要中塩賣窩買窩情由設計隱瞞仍舊冒支官塩掣賣者許諸人首告給賞正犯追完塩

課發邊遠充軍干碍勢要聞處治巡塩御史運司官吏知情容令掣支各治以罪其見堆皇塩并各處已賣銀兩未賣塩斤盡數入官各項入官塩課巡塩御史作急回奏戶部查照邊儲急缺去處開中本色糧料以濟急用

一在內御馬倉天師庵中府二草場在外填上等十九馬房倉吳家駝裏外半房司牧司司牧局今年合用糧料草束於原會數內減去一半坐派以甦山東河南北直隸小民困苦以後年分還着巡視科道官備查馬匹牛羊實在數日照

數會計以免冒濫

一近來抄沒犯人莊田園圃戶部委官從公查勘如有倚恃權勢侵奪霸占者審証明白歸還本主管業若係原有及兩平置買價直無虧者照依時價變賣銀兩送太倉銀庫交收備邊若地畝數多離京五十里之外者行令該管州縣召人佃種照例起科

一抄沒犯人玄明宮地土原係軍民住居墳墓該給主者該部會同科道官逐一查審明白給主管業

近年各處鎮守協守分守守備等官違例奏帶人衆到于地方科歛財物奪占功次所在不才官員因而乘機指一科十貪利成風以致百姓受害深可痛心詔書到日例外奏帶人員即便各回原衛原籍閑任當差違者許撫按并按察司官察訪叅奏拿問官舍旗軍調邊衛差操民發口外爲民書辦省祭等官革職不敘今後敢有仍前奏帶人多及帶軍民職官錦衣衛旗校者該科即時劾奏究治其鎮守等官中貪刻顯著壞事有名者各該巡按御史指實具奏取回

司禮監從公推舉平素廉靜老成之人奏請更替仍照舊例寫勅不許干預錢糧詞訟侵越諸衙門職掌亦不許假以進貢爲名貪取皂隸科歛銀兩擾害軍民額外進貢一切停止

一漕運官軍僨運糧儲經年累歲不得休息貧苦可憫正德十四年以前京通二倉若有掛欠糧米席皮板木脚價一切赦免其南京并臨德徐淮水次拖欠者不在此例

一漕運官軍借欠債負利上生利爲害百端自正德十五年以前借者不拘多寡俱不許還以蘇

漕運官軍困苦以後再借再放者聽漕運都御史巡按巡倉御史查例叅奏重治

一各處徵糧養馬地土內有水衝沙壓坍江等項負累人戶包養累經具奏者巡撫巡按官查勘明白具奏除豁

一各解納錢糧到京內外管收人員刁蹬需索使用之數多於本物以致上納不敷重複徵解貽累小民該部申明禁約許被害之人指實奏告治以重罪

一南北直隸山東山西陝西湖廣浙江江西等處

經濟錄卷十四  
十七  
地方大軍經過及雖無軍兵經過但奉有明文  
取辦供應軍需等項所司動支官錢糧應付者  
各該撫按官查勘明白准作正支銷不許復行  
徵補重困小民

一內府多餘宮人着司禮監逐一查審有親屬者  
各令的親家屬領回任其婚嫁無親屬者官與  
婚嫁務令得所

一在京抄没犯人錢寧等并江西逆賊宸濠等入  
官財物除金銀并器皿首飾珍寶及違禁之物  
外其餘紗羅紵絲綾紬布絹鋪蓋衣服靴帽家

火器玩等件若貯庫年久不無滯爛損壞可惜  
着戶部科道各差官二員查盤見數估計鈔貫  
明白補放文武衙門官員正德二十四十五  
年各上半年折俸之數若有多餘挨年再補  
一各處無籍奸人游食術士及無名內使私自淨  
身人等多有投託王府因而撥置害人甚則貽  
累宗室詔書到日許令自新各還本務各該撫  
按官仍要嚴加禁治不許故縱容留以稱朝廷  
親親至意

一文武官員有因事住俸罰俸回話者悉皆着免

一南京內府各監局軍匠有丁盡戶絕名伍不除  
冒支月糧者南京戶兵工三部盡行查革

一近年以來內府各監局官員內使添增太多供  
用浩繁甚非

祖宗舊制司禮監逐一查選照依弘治以前員  
數存留供事多餘之數俱以本等職事聽用如  
遇各王府及內京各監局缺人奏請撥去應用  
其原係海戶黃緣驟入者仍舊查充海戶見充  
海戶者禮部盡數發回原籍爲民當差不許在  
京潛住其原係樂工淨身收內府者亦盡數革

### 退發南京

#### 孝陵衛充軍

一私自淨身之人多有在京潛住希圖收用着錦  
衣衛緝事衙門巡城御史嚴加訪拿問今後各  
處軍民敢有私自淨身者本身并下手之人處  
斬全家發煙瘴地面充軍兩隣及歇家不舉首  
者俱治以罪

一宸濠之變都御史孫璉按察司副使許達仗節  
死義并一時被害不屈之人日久尚未褒錄都  
御史王守仁倡義督兵平定禍亂并同事協謀

一 有勞之人亦未及論功行賞該部即便會官擬議奏來定奪

一 問刑衙門有抄提在官人口犯該反叛應連坐未給配安置者奏聞定奪其有律不該載者悉皆放免原沒官田產給還任種照舊納糧當差

一 正德元年以後在京在外官旗軍舍人等但係例外奏帶及稱報効在各邊各處或一人數處或一時兩三處報功及併功陞官旗者除原祖職役照舊其餘盡行除革各衛所各將革過名數送戶兵二部查考敢有受財隱避不革及抗

違妄奏者俱問發邊衛充軍其諸色人等冒認錦衣衛官員戶下舍丁致陞官旗者限三箇月以裏許各官旗自首與免本罪冒籍之人革去職役過限不首該部查出或被入告發通行治罪發遣

一 正德十二年十月內大同應州功次極爲冒濫內有傳陞文職者吏部查奏軍職除本邊官軍自斬首級例該陞級外其餘陞者不分已未領受兵部查奏裁革

一 近年軍職人等在各邊不曾斬有首級巧立當

先衝鋒等項名色及各處斬首不及數該部照例擬賞奉旨陞級世襲者兵部通行查革

一武職并舍人舍餘旗校納銀等項授職并冠帶者獲功止許於實授職役上加陞

一賜姓人員及見犯罪冒姓者各復本姓在京者各照原有本等職役閑任隨任當差在外取到留用者不分官職大小各回原衛原籍帶俸閑任但因賜姓義子廕陞職爵并與做勇士等項食糧名色者兵部盡行查革原係在外官員罷閑并原跟犯罪勢要無名籍惡黨俱不許在京

潛住違者錦衣衛巡城御史五城兵馬司挨拿

遞解窩家送問

一在京武職除近選軍政并會保將材外其餘有告願改調外衛者該部查勘相應具奏改調仍聽撫按官照例考選管事

一軍職病故子孫告襲扣筭年月但在十年以裏該衛查勘明白保送到部者即與收選免其駁查

一錦衣衛校尉專係直駕人役近年多有奏討投託濫占跟用因而令其幹辦私事脅制害人該

衛盡行查明取回

一南京年例進鮮馬快舡隻舊例每起不過三隻正德九年以來違例撥給比舊加多攬載客貨沿途攬擾本等廩給夫役之外勒要銀兩數多甚爲民害兵部出榜通行禁約今後進鮮舡隻務照舊例撥給經過地方不許分外生事勒要折乾銀兩違者巡按巡河等官指實參奏不許故縱

一順天保定河間三府各州縣自正德三年以來寄養馬疋俱各年齒衰老節次允軍揀退不堪

負累民餒養兵部行文太僕寺分管官督同該府州縣管馬官勘實果係老馬變賣價銀轉解太僕寺貯庫贖補買馬支用

一法司錦衣衛見監罪囚中間或鍛煉成獄或拘泥文案多有枉抑今後問刑務要法當其情不許深刻所問犯人及在外問成解來人犯伸訴冤枉或調別衙門多官會審務要從公推問實情果有冤枉即與辨理不許拘執成案逼勒招認符合前問官吏致令枉抑無伸違者罪之一凡問囚犯今後一依大明律科斷不許深文妄



引參語濫及無辜其有奉旨推問者必須經由大理寺審錄毋得徑自參奏致有枉人近年條例增添太繁除弘治十三年三月初二日以前曾經多官奉詔會議奏准通行條例照舊遵行外以後新增者悉皆革去

一江西并各處地方先因宸濠反逆事敗及因人告報謀反妖言等項事情一時追捕餘黨急於撲滅不暇審辨未免有迹涉疑似被誣逮繫者經該問刑衙門務要嚴加詳審果係誣枉即與釋放若係逼脇順從者問擬明白奏請定奪

毋得冤抑淹禁

一內外各衙門見監死罪重囚犯在赦前罪不該宥內有情可矜疑曾經奏請未得饒死及歐傷人延至辜限外身死照例仍擬死罪者詔書到日覆審是實俱免死發邊衛永遠充軍若有辨問罪不至死者即行查照發落

一見監與宸濠謀反事情有干正德十四年就陣擒獲及續拿人犯三法司錦衣衛先行會問明白其真正共謀逆賊并臨時脇從及先年交通不曾與謀者各依律議擬應得罪名再會多官

覆審相同具奏定奪毋致輕縱冤枉

一各處盜賊多因饑寒困苦流離失業脇從逼迫嘯聚爲非詔書到日各該官司通行出榜曉諭許其自首免罪軍還原伍民還原籍各存恤一年免其差徭其有能擒捕首惡黨類報官者照例陞賞仍量給犯人財產

一官吏軍民人等自正德九年正月二十八日以後至正德十六年四月二十二日以前有爲事問發充軍遷發爲民者除原係真犯死罪饒死及事干謀反逆叛奸黨失機強盜撥置侵盜係

官錢糧指稱打點誣騙者不赦外其餘悉皆放回原衛原籍寧家隨住若有赦前逃回不首原係真犯死罪饒死充軍例該照依原擬處決并雜犯死罪以下充軍例該枷號改發極邊衛分者免其處決枷號仍各發原充衛所着役其遷發爲民者免其問罪仍發原編配所

一內外各衙門罪犯該追贓物係還官給主銀貨至五十兩以上并入官至一百兩以上監追一年之外及正犯身死拘禁家屬各勘無家產堪以變賣陪納者開具所犯情罪奏請定奪其不

及前數監追半年之外及正犯身死各勘無家產并例該追罰馬牛等項悉與宥免查照發落若係埋葬銀正犯見在者仍依律追給

一內外衙門有問完官吏軍民人等罪犯已經奏請未曾奉旨發落應該宥免者即行查照發落其有監候行勘未報人犯罪該宥免者并正犯在逃監禁家屬証佐不係事干謀犯逆叛劇賊者悉令保候歸結

一近年節次奏開生員納銀入監事例積累數千餘人大壞選法今後再不許奏開違者吏部該

科即時糾劾究治已開未納者即便停止至於額設吏役亦須得人近年納銀收充阻塞正途之人致令歇役革退雖有考選事例繁復不一吏部便查會典開載選撥吏役舊例申明遵守行令各布政司直隸府州凡遇缺吏從公考選徑自收叅納銀人役務令習學字書通曉文移方許收叅若願告改撥衛所事簡衙門者聽俱開報巡按御史查照訪察內有選撥不公或被人告發或按問得實依律究治

一各書辦人員除大營額設員數外其餘黃緣額

外添設者并各夷地方遠年不用小通事冒濫保補者通行查革

一工部供應內府各監局內官內使人等年例柴薪靴料皮張冬衣鋪陳紵絲綾紬紗羅等項近年以來增添數倍該部往往借貸別項官錢輾用動經數萬累及官民終非經久之計着司禮監會同該部查照永樂至天順年間人員數目關給則例通融處置除見有本色物件外不敷之數將近年抄沒犯人贓物銀兩兩平估折相兼表改准作正德十五十六年年例之數少寬

民力

一兩京各監局等衙門近年額外增添器物如龍艇戰車神象店房等項數多管事人員乘機作弊將物料工作任情冒派侵剋害民今後除舊額器物房屋應修理成造者俱照會典所載舊定數目從實會計除本衙門并各庫會有外會無者量爲從省派辦不許隱匿冒濫改舊添新并招買那借貽害小民違者治罪

一內府禁密之地不許蓋造離宮別殿載在祖訓萬世當遵近年以來節被左右近幸之人

獻諂希恩在內添蓋新宅佛寺神廟總督府神  
武營香房酒店之類在外添蓋鎮國府總督府  
老兒院玄明宮教坊司新宅石經山祠廟店房  
等項便着內官監工部錦衣衛科道官逐一查  
勘但有不係舊規者或折毀改正或存留別用  
或變賣還官官匠人等有因蓋造陞官者亦就  
查革改正在外聽撫按官一體查勘改正變賣  
還官不許隱匿

一近年南京駕到各樣舡隻數多俱在通州張家  
灣停泊勞人看守日久損壞無用着內官監工

部便去會着除年例黃舡照舊存留聽候外其  
餘烏龍舡發送南京兵部改作擺江舡黃舡發  
送南京工部照舊看守聽差黑樓等舡發送杭  
州府等處聽候進鮮進龍衣等項公用免派民  
間修造其餘魚舡等項變賣價銀收貯監部以  
備修造正支

一荊州杭州蕪湖三處抽分廠專為打造糧舡成  
造供應器皿而設以省科派小民之計近來兩  
京各監局相沿且奏差人赴蕪湖廠支取杉楠  
等木數多又有內官監差官中半抽分二年有

餘致將造舡銀料不敷支給累及運軍出利揭  
債缺舡運糧耽誤國計今後南京各監局合用  
竹木聽於本處龍江瓦屑等抽分廠支取在京  
各監局合用竹木聽於內官監神木廠并真定  
盧溝橋抽分廠支取其內官監原差抽分太監  
李文等詔書到日即便回京以後不許援例奏  
差

一天下司府州縣抽分稅課衙門俱有定額近年  
以來凡橋梁道路關津有利處所私自添設無  
名抽取數多甚爲民害詔書到日巡按御史及

按察司分巡官通行查革有司嚴加禁約不許  
坐視故縱

一河防水利小民衣食之源關係最重各有專官  
管理該管官員務要躬親巡歷嚴督所屬修築  
圩岸疏濬溝渠但有權豪刁潑之家修建池亭  
設立碾磨阻壞水利坑陷錢糧者并聽自首拆  
毀改正與免本罪若有抗拒官府執迷不首者  
許隣佑之人告舉究治所在官司容情故縱者  
事發一體治罪

一易州山廠柴炭今後悉遵先年舊額派納惜薪

一司近年新添加耗之數俱改正照舊其有攬頭指稱打點多勒價銀許被害之人首告官廠侍郎痛加改革不許仍踵前弊如違治以重罪

一自正德年來劉瑾錢寧江彬相繼擅權在京在外各該衙門弊政多端詔書該載不盡者許逐一自行議奏裁革

一近來冒濫玉帶蟒龍斗牛飛魚服色數多除五府九卿堂上官外其餘庶官雜流并各處將領頭目諸色人等但係夤緣奏乞傳賜者俱不許穿用內府各監局官員司禮監查奏裁革武職

一卑官僭用公侯服色花樣者一體禁約

一浣衣局近年抄沒婦女法司逐一吊查原卷詳究事由情可矜宥者具奏釋放

一錦衣衛旗校人等除弘治年間編軍冊內見在數目外其餘詭名頂補僉補在逃故絕等項人役冒濫食糧者戶兵二部各選差屬官會同科道及本衛公正官查議裁革

一豹房各處積年收貯并近日抄沒犯人銀兩司禮監查記明白數內運數百萬兩於太倉銀庫收貯以備折放官軍俸糧等項支用

一正德元年以後各衙門官軍旗校人等緝捕妖言奸細并不係臨陣對敵強賊一應陞授職役者通行查革以後各衙門照舊年終類奏兵部查議陞賞

一正德年以來傳陞乞陞法王佛子國師禪師等項禮部盡行查革各牢固枷釘押發兩廣煙瘴地面衛分充軍遇赦不宥近日奏討葬祭一切停革其中有出入內府住坐新寺誘引蠱惑罪惡顯著見在京者禮部通查明白錦衣衛還拿送法司問擬罪名奏請定奪

一先在軍門辦事指揮張璽張倫及掌案寫字等項人員宮勲趙真殷大安王鎬王鎮陳貴龐璽晁用鄭曦賈銘高澗朱鳳翔管皇店千戶趙謹姚俊俱倚勢生事蠱政害民內外軍民怨入骨髓本都當處死姑從寬各連當房家小押發兩廣煙瘴衛分充軍其餘跟隨辦事管店助惡有名小班答應旗校人等錦衣衛還拿送法司究問中間罪惡顯著者一體押發兩廣煙瘴衛分充軍家小隨住俱遇赦不宥

一回夷寫赤虎仙交通土魯番興兵構亂攪擾地



方以致哈密累世受害罪惡深重曾經科道鎮  
巡官勘問明白既而黃緣脫免錦衣衛還拏送  
法司查照原擬開奏定奪

一回回人于求出入豹房誘引蠱惑情罪重深錦  
衣衛拏送都察院追問明白議擬罪名奏請處

治

一今後照依舊例給事中有缺於進士內考選奏  
補御史有缺進士與行取人員相兼考選除授  
一朝廷政事得失天下軍民利病許諸人直言無  
隱

一已上與革政令詔書到日有司即便奉行如有  
延緩者許巡按御史按察司訪察究問俱以違  
制論

嗚呼君人之道在昭德以塞違繼世之規惟更化  
而善治特頒渙號用慰輿情弘施大賚之恩永錫  
太平之福四方臣庶咸使聞知

乞停差官織造疏

楊廷和

懇乞憫念災傷窮民乞 賜停止差官織造事內  
開近該臣等奏乞免撰差官織造 勅書節奉  
聖旨官已差了再不必具擾執物欽此臣等一聞

此旨相顧驚愕備員大臣素蒙禮貌不意  
 聖明一旦有此在朝群臣亦皆彼此駭嘆謂雖正  
 德年間亦未見批荅內閣題奏有如此旨意者臣  
 等固當引身求避以明不可則止之義但展轉以  
 思不能無庶幾改之之望若以具擾執拗為嫌而  
 乃悻悻然見于其面非臣之所宜自處也臣等豈  
 敢以此擾  
 陛下哉恐災傷窮民不堪織造之擾千百成群起  
 而為盜以覆天下也亦非敢固執已見違拗不通  
 也執

祖宗之法欲望

陛下遵而行之以保宗社勿以天下公議大相  
 拗以取後世之議也今臣等言之不聽九卿言之  
 不聽六科十三道皆言之不聽獨二三邪佞之言  
 聽之不疑

陛下獨能與此二三邪佞之臣共治

祖宗之天下哉 聖旨又謂織造係累朝事例臣  
 等考之洪武永樂洪熙宣德正統天順累朝并不  
 曾差官織造雖成化弘治中間一行之亦非朝廷  
 美事

憲祖

孝考恤民節財聖德善政非止一端

陛下皆不取以法乃獨舉此不美之政以爲事例豈可以爲事例也方

陛下登極之初嘗傳旨欲更換廣西鎮守廣東市舶并提舉大堤馬房守備倒馬關等處及看守廉州府珠池各項官員臣等先後具題俱蒙 俞允  
停止各官不差 勅書俱免撰寫海內之人方傳  
領

聖政之美何故今日織造一事乃獨不蒙嘉納特

降 前旨雖出 御筆親批決非司禮監官所敢

議擬不知撰寫進呈果出左右何人之手我

祖宗朝一應批荅皆由內閣擬進惟正德年間權

奸亂政有擅自改擬營求 御批以濟其貪私者

新政以來不曾明正其罪遂令此輩邪佞小人敢

於今日復蹈前車覆轍其心惟欲蒙蔽蠱惑以圖

身家富貴不顧生靈休戚 社稷安危

陛下何忍墮其奸計壞

祖宗之法度哉

祖宗天下至正德間幾致傾覆仰賴

陛下再造乾坤轉危爲安中外軍民始獲稍甦然  
國勢民力比之成化弘治等年百尚不及一二今  
日豈堪敗壞邪興言及此可爲流涕臣決不敢撰  
寫 勅書以重誤國殃民之罪伏望

陛下俯垂監察停止織造官員不差仍乞 命司  
禮監官將前項蒙蔽蠱惑邪佞小人逐一查出斥  
逐在外不許仍前侍奉左右以杜後來亂政壞事  
之漸實 宗社萬萬年無疆之慶奉

聖旨卿等所言具見忠誠愛君恤民至意朕心已  
知宜安心辦事但官已差了寫勅書與他着安靜  
行事毋許分外擾人該衙門知道

皇明名臣經濟錄卷之十四

皇明名臣經濟錄卷之十五目錄

內閣

論簡侍從之臣一

丘濬

論簡侍從之臣二

丘濬

論簡侍從之臣三

丘濬

論東宮官

王鏊

論內閣

王鏊

論史官

王鏊

論翰林

王鏊

論內閣官制

王瓊

論內閣  
王鏊

論翰林  
王鏊

論史官  
王鏊

論內閣  
王鏊

論東宮  
王鏊

論尚書  
王鏊

論尚書  
王鏊

論尚書  
王鏊

內閣

皇明名臣經濟錄卷之十五目錄

皇明名臣經濟錄卷之十五

新安黃訓集

新安汪雲程校

內閣

論簡侍從之臣  
丘濬

臣按八柄詔于冢宰內史復掌以詔王蓋史官公

論之所在爵祿廢置殺生予奪之柄有所不公史

氏直筆以書之吳澂謂內史為翰林之職蓋以其

命諸侯公卿大夫則策命之猶今學士院之草制

詔也然謂之史乃掌文書贊治之名今制併史館

於翰林其亦此意歟我

太祖皇帝於吳元年已置翰林院以陶安爲翰林  
學士於是設承旨學士侍講侍讀學士直學士及  
待制應奉等官洪武九年詔定百官品級承旨與  
六部尚書俱正三品學士從三品侍講學士從四  
品十八年三月始定翰林官制而革承旨直學士  
待制應奉之名設學士二員秩五品講讀學士各  
一員從五品其屬則有侍講侍讀五經博士典籍  
侍書待詔外此又設修撰編修檢討以爲史官皆  
屬之翰林院焉夫學士代言之官講讀經筵之職

五經博士典籍則前代秘書之屬侍書待詔則前  
代供奉之名而所謂史官者則前代著作起居之  
任也今則併屬於翰林則是今代翰林一司實兼  
前代諸職其職任尤非他官比也永樂初

太宗皇帝又柬七人者入內閣專知制誥備顧問  
參預機務然其秩猶止五品也至

仁宗皇帝又于本官上加以卿佐師保其任用尤  
爲重焉歷任旣久又易本官以文淵閣大學士萃  
蓋殿謹身殿武英殿大學士云

論簡侍從之臣二  
丘濬

臣按編修檢討專以修史始見於此前此固有所謂編修官者蓋專以修經武要畧爲職屬之樞密院名雖同而實則異也然編修檢討在前代者皆名以官我

朝止稱編修檢討云臣嘗因是而通論古今之史官矣夫天下不可一日而無史亦不可一日無史官也百官所任者一時之事史官所任者萬世之事周禮宰夫八職有史以贊治漢法大史公位丞相上天下計書先上太史公副上丞相唐及宋宰相皆兼史官其重有如此者自成周有左右史漢有起居注唐宋起居舍人著作郎之屬皆所謂史官也我

朝開國之初猶設起居注其後革之而惟以修撰編修檢討當國史馬遇有纂修則以大臣爲之監修學士爲之總裁其法制可謂簡而要矣然是職也是非之權衡公議之所繫也禹不能褒鯀管蔡不能貶周公趙盾不能改董狐之書崔氏不能奪南史之簡公是公非紀善惡以志監戒自非得人如劉知幾所謂兼才學識三者之長曾鞏所謂明足以周萬事之理道足以適天下之用智足以知



難知之意文足以發難顯之情不足以稱是任也雖然此猶非其本也若推其本必得人如元揭傒斯所謂有問學文章知史書而心術正者然後用之則文質相稱本末兼該而足以爲一代之良史矣

論簡侍從之臣三

丘濬

臣按前代藏書之府非止一處而掌書之官非止一職名數雖異而職務畧同今代圖籍皆藏內閣所設之官止一典籍馬蓋

本朝翰林之官雖有異名實無異職其所儲書非

獨以存前代之舊蓋將以資儒臣之考閱講究以開發其聰明以爲異時大用之具也仰惟

太祖開基旣設翰林院置學士等官又慮人才非儲養作興不能有成乃洪武癸丑命編修張唯等十人入禁中文華堂肄業詔宋濂爲之師

上聽政之暇輒幸堂中取其文親評優劣命光祿給酒饌每食皇太子親王迭爲之主給冬夏衣時賜白金鞍馬

太宗永樂甲申命學士解縉選新進士中材質英敏者得修撰曾棨編修周述周孟簡庶吉士楊相

王英王直等二十八人又增周忱爲二十九人俾就文淵閣進其學且諭之曰文淵閣古今載籍所萃爾各食其祿日就閣下恣爾玩索務實得於已庶國家皆得爾用命司禮監給筆札光祿寺給飲食分鈔以市膏燭賜第以爲居止

列聖相承按爲故事每遇開科間于進士中選其俊異者如甲申制讀書中秘以儲養之前後得人比諸他年進士爲多用之當時有得賢之效書之史冊爲儒者之榮是誠一代之盛舉也臣伏讀文皇帝諭蔡等有曰人須立志立志則功就未有

無志而建功成事者汝等皆今之英俊當立志遠大不可安于小成爲學必造道德之微必具體用之全爲文必驅班馬韓歐之間古之文學之士豈皆天成亦積功所致也一時諸賢服膺

聖訓莫不奮發立志勉進學業皆大有所成就留者擅文學之名出者播政事之譽大哉

皇言其所以主張文教作興人才爲世道慮也一何遠哉三代以下所僅見也嗟夫賢才不易得亦不易知必隨時而取之不限一時必多方以試之不拘一藝然後賢才畢用而無遺苟惟取之於此

時而他時則否試之以一藝而他藝則否而欲所用皆得其人難矣臣請著爲定制一次開科一次選用簡擇之餘乃分諸司觀政待新進士詣大學行釋菜禮畢卽勅禮部諭俾各錄平日所作文字投獻所作如詩賦序記路頌封送翰林考訂其書論疑古評史之類中有辭未文理其學可進者別出題試之其所試之文與所投之卷相稱卽取以預選不問年之長幼質之強弱苟有器識才思者卽如故事命官教育以俟其成若其辭鉤棘而意詭異者不在所取三年之後隨其才器而任使之每科不必多選不

過二十人每選不必多留所留不過三五輩如此則國家儲材以待用者無非通經學古明體適用之國家儲材以待用者無非通經學古明體適用之儒布諸庶位列於內外者又皆得夫文學博雅之士以錯雜于政事法理之間以潤飾之臣見天下彬彬然多文雅之士儒皆真儒吏非俗吏凡其製作以華國施爲以輔世者咸有可稱述者矣爲治要務用人要術莫先於此

論東宮官

王鏊

人君之學與不學係天下之治亂太子之學與不

學係後日之治亂其重可知也賈誼曰天下之命懸於太子太子之善在于早諭教慎選左右今夫庶民之家有子焉則必擇保姆以保護之擇良師傳以教道之而况神器所屬係宗社之安危生民之休戚者乎昔者成王幼在襁褓召公爲太保周公爲太傅太公爲太師所以保其身體傳之德義道之教訓此三公之職也又置三少曰少保少傅少師與太子宴游者也又選天下端正孝弟博聞有道術者以翼衛之所與居處出入者也逐去邪人不使見惡行故太子生而見正事聞正言行正

道前後左右皆正人也其身有不正者乎古之教太子者其制如此今

國家東宮之官師保而下有庶子諭德洗馬校書等官亦既備矣然官以序進未必皆天下之選學之日晨而授書授畢而退日中進講講畢而退况初寒暑雨學皆間歇間歇之日所與宴游者誰歟所與居處出入者誰歟不可得而知也又近世之弊患在上下不交然爲太子亦且未同於君今也則已儼然端默有言且不敢進又况爲君之日乎求上下交而德業成胡可得也昔者三王之教世

子必齒於學國人觀之曰將君我而與我齒讓何也曰有父在則禮然然而衆知父子之道矣其二曰將君我而與我齒讓何也曰有君在則禮然然而衆知君臣之義矣其三曰將君我而與我齒讓何也曰長長也然而衆知長幼之節矣此所以學爲父子君臣長幼之道而與人同如此下至漢唐此意泯矣然明帝授書於桓榮及爲天子矣執醬而饋執爵而酌唐劉洎岑文本馬周迺日往東宮談論治道李泌與肅宗爲布衣交出則聯轡寢則

對榻

國朝洪武初建大本堂取古今圖書充其中延四方名儒教太子親王分番夜直才俊之士充伴讀時時賜宴賦詩商確古今評論文學無虛日仁宗于潛邸臣嘗伏觀其教令長至燕勞東宮之臣如家人父子又從學詩學爲表則本朝之初亦未嘗如今制也英宗幼冲當時大臣無深識遠慮阿時所好務爲尊君卑臣非祖宗之法本然也今雖未能如古之制亦宜稍畧君臣之儀敦師友之分使宮僚日侍左右從容講讀講讀之暇宴飲出入居處皆得

周旋其間至暮乃退或有剪桐折柳隨事諫止游  
戲翰墨端其所嗜宮僚有不法從三師糾正之甚  
者斥逐不使邪人得預其間如此所謂一人元良  
萬邦以貞三代所以久長者用此道也漢宣帝時  
欲使外家許氏監護太子家疏廣以爲太子師友  
必于天下英俊不宜獨親外家太子官屬已備復  
使舜監護視陋非所以廣太子德于天下也貞觀  
中撰太子接三師之儀出殿門迎太子先拜三師  
荅拜每門讓三師坐與三師書前名惶恐後名惶  
恐再拜宋天禧二年庶子張士遜等言臣等日詣

資善堂參見皇太子雖令升階列坐然後跪受墜  
令皇太子坐受參見詔不許至道元年皇太子每  
見賓客必先拜迎送常降階及門乾道七年討論  
東宮開講拜慶賀辭謝禮儀宮僚講讀當依倣講  
筵稍殺其禮詹事以下至講讀官上堂并用賓禮  
參見依官職序坐皇太子正席講讀官迭起如儀  
延英講罷復位節朔不受宮僚參賀元日冬至詹  
事以下箋賀謝辭初以常見之禮後離位致辭復  
位就坐茶湯罷詹事參見拜皇太子荅拜庶子等  
初上參見皇太子受拜庶子諭德乃講讀雖有坐

受之禮止是五禮定三師朝賀東宮儀

上以東宮師傅皆勳舊大臣當待以殊禮朝賀難

同庶僚乃命考定其儀曰唐制群臣朝賀東宮行

四拜禮皇太子答後二拜三公朝賀前後俱答拜

近代答拜之禮不行而三師之禮不可不重今擬

凡大朝會前期設太子坐於大本堂設答拜褥位

于堂中三師賓客拜位于堂前至日太子常服升

座三師賓客常服入就位北向立皇太子起立南

向贊四拜太子受前二拜答後二拜乃退

震澤文集

論內閣

王鏊

予在翰林與陸伯廉語及楊文貞廉伯曰文貞功之

首罪之魁也予問何為廉伯曰內閣故有絲綸簿

文貞晚年以予稷故欲媚王振以絲綸簿付之故

內閣之權盡移中官予亦不知其然否及予入內

閣歷朝詔誥底本皆在非所謂絲綸簿乎不聞送

入况中官之專與否不在一簿之存亡也顧人主

信用何如耳廉伯之言不知何所從授天下皆傳

之嘉靖初年言路大開諫官紛然爭言利害有謂

文貞居憂謀奪情起復遂以絲綸簿奉振不知文  
貞晚年歸省墓未嘗居憂也甚者又謂文淵閣印

亦爲司禮監所奪請追還之詔問印與絲綸簿今不知安在令言者自來追理還之言者伏罪乃已

論史官

王鏊

前代修史左史紀言右史紀動宮中有起居注如晉董狐齊南史皆以死守職司馬遷班固皆世史官故通知典故親見在廷君臣言定而書之後世讀之如親見當時之事我

朝翰林皆史官立班雖近螭頭亦遠在殿下成化以來人君不復與臣下接朝事亦無可紀凡修史則取諸司前後奏牘分爲吏戶禮兵刑工爲十館

事繁者爲二館分派諸人以年月編次雜合成之副總裁刪削之內閣大臣總裁潤色其三品以上乃得立傳亦多紀出身官階遷擢而已間有褒貶亦未必盡公後世將何所取信乎

論翰林

王鏊

宋時兩制皆文學名天下者始應其選雖一甲三人亦出知外任然後召試欲其知民事也其餘應試率皆一時赫然有名中外所謂制科是也故文學之士不至遺棄又通知民間利病以其曾試於外也



國家翰林侍從亦兩制之類率用高科其餘則用庶吉士一甲三人終不外任庶吉士每科或選或不選留者或多或少國家之意本欲使之種學績文以爲異日公卿之儲士旣與此選自可坐致清要不復苦心於學又不通知民事天下以文學名者不復得預遺才頗多故不若制科之爲得也制科行人人自奮於學以求知於上不待督責矣

論內閣官制

王瓊

朱子著中庸或問至敬大臣章有云使大臣而賢也則可如其不賢則所謂偏聽生奸獨任成亂禦

下蔽上以成其私而主不覺悟者亦安得而不慮也曰彼其所以至此正坐不知九經之義而然耳使其能明此義則必以正心修身爲本而得其人以任之矣不幸而有趙高虞昇李林甫之徒則亦亟求人以易之矣苟爲不然吾恐君上之權不在大臣而移於左右其爲國家之禍可勝言哉朱子此說是欲君聖臣賢兩得其人也然自古以來雖有賢君而爲奸臣蒙蔽亂政亡國者多豈能君臣皆得其人哉惟我

太祖垂訓立法高出千古罷丞相任六卿無偏聽

獨任之弊此法能世守之朝政悉付六卿如有違  
枉臺諫得糾正論劾 朝廷端拱以照臨於上萬  
世無弊矣嘗見紀國初事蹟者內載洪武間設有  
殿閣大學士其職不過代草辭令然每有犯輒罪  
黜凡制誥碑文祭文多出 御製如今天下各衙  
門表箋祝文祭文雖臣下所用亦出 御製至于  
武臣誥命皆組織之不書其每日群臣奏事面奏  
取 旨畢各衙門將奉 旨意批寫本後送該科  
類寫奉到 旨意覆奏豈有太學士學士敢自爲  
口旨送內批于本面發出之事乎永樂始建內閣

於東門內命解縉黃淮胡廣胡儼楊榮金幼孜楊  
士奇七人在閣辦事尋陞侍講

仁宗皇帝正位東宮皆轉春坊官凡草制纂修等  
事惟翰林院掌之無內閣掌管之說也如永樂十  
三年纂修性理大全書成翰林院學士兼左春坊  
大學士奉政大夫湖廣奉政大夫右春坊右庶子  
兼翰林院侍講楊榮奉直大夫右春坊右諭德兼  
翰林院侍講金幼孜上表進呈蓋雖春坊官必須  
兼翰林院職銜方得預纂修之事未有殿閣大學  
士而獨專纂修之事者也况永樂間胡廣所兼不

過春坊大學士則是時殿閣大學士不設已久矣  
今雖尚書在內閣辦事六部請勅手本只云合用  
手本前去翰林院寫勅施行則舊意猶存可攷也  
終永樂之世二楊官止五品蓋爲衙門所拘初未  
有衙門小官大之例也

仁宗登極始以東宮舊臣陞士奇爲禮部侍郎尋  
陞少保轉少傅兼華蓋殿大學士楊榮爲太常鄉  
進太子少傅兼謹身殿大學士又陞工部尚書在  
閣辦事楊溥永樂間繫獄十年至是釋出擢翰林  
院學士尋陞太常卿兼學士內閣辦事此三人皆

以  
龍飛超陞委任不可以例論也後楊溥丁憂起復  
不入閣宣德間因九年三品職滿方陞禮部尚書  
學士如故

英宗卽位復命入閣正統四年修

宣廟實錄成進少保楊士奇楊榮俱進少師號三  
楊初楊榮陞尚書不過工部則不敢兼官壓六卿  
之意可見然自此官制一變其後遂使雜流出身  
在內閣書辦年久者亦得陞至尚書至于序班道  
士亦以年資陞至尚書掌鴻臚寺太常寺事皆三

楊開其端也由是內閣之權漸重無異宰相之設  
六部之權漸輕凡事多稟受內閣風旨而後行率  
使

祖宗官制額定之員得以增置而日久因襲遂不  
可復改矣

皇明名臣經濟錄卷十五

皇明名臣經濟錄卷之十六

新安黃子訓集

新安汪雲程校

吏部 文選上

題戒省官員事

商輅

臣叨侍近密輒以愚見數事開具進呈伏乞

聖覽如有可行乞 勅該衙門施行如中間事有

難行者乞賜寢罷干冒 天聰不勝戰慄之至謹

具題以聞

一貴州湖廣先因猫寇猖獗蒙 欽差保定伯梁

珪右都御史王來并叅將等官統領官軍往彼  
征勦卽今賊勢已息地方稍寧而總兵等官在  
彼久住軍馬衆多供給艱難况聞四川湖廣之  
民攢運糧餉不勝疲弊乞

勅該部將梁珪等取回彼處止令都督方瑛陳  
友照依原奉事理調度二處官軍往來撫捕相  
機守戰其貴州方面并府州縣流官俱係額外  
添設之數俱乞取回庶得少甦民困地方幸甚  
一臨清不過一縣地方先蒙 欽差平江侯陳豫  
往彼鎮守築立城垣開設衛分操練軍馬卽今

已有次第切慮彼處巡按巡河管閘管糧收鈔  
收磚等項御史主事等官常不下七八員不無  
官多民擾乞

勅該部將陳豫取回止令本衛指揮等官照例  
操守巡按御史經過提督實爲便益臣又照得  
真定保定二府既有僉都御史祝暹在彼巡撫  
兼守備倒馬關其易州鎮守又有叅贊軍務僉  
都御史陳泰近聞祝暹患病未痊合無陳泰不  
妨叅贊照鄒來學事例就令巡撫真定保定及  
提督紫荆倒馬關將祝暹取回定奪庶得責任

歸一

一正統年間各布政司地方俱添設僉事一員專管屯田而南北直隸亦各設僉事於河南按察司帶俸令其提督順天并鳳陽等府屯種緣河南按察司與直隸有司無相統屬行事之際不無掣肘誤事今後南北直隸屯田合無照提調學校事例另設御史管理惟復止令一處清軍御史帶管將見在僉事革去庶使便於行事

一山東等布政司并直隸保定等府正統十四年起取民壯不曾赴京見在本處地方操守者彼

時勅旨丁寧諭以事平之日卽放寧家今經三年未見定奪况前項民壯俱係丁多殷實頭等人戶大縣或五六百名小縣或不下二三百名除此之外有司每歲科派不無靠損下戶貧難小民愈致失所乞

勅該部行移各處將見操民壯悉發寧家一體當差其在京操守民壯并舍人餘丁人等亦乞勅該部計議酌量放免庶幾恩信兩全日後易於驅使

一薦舉本以求異才若

國家科目未開則薦賢之路不可不廣方今科目大開豪傑之士皆由此進則薦舉之道豈容大濫臣切見各處保來儒士例皆除授教職中間多有學問膚淺禮貌粗疎不由學校罔知大體此等之人一槩使之爲人師範豈不有悞後學乞

勅該部將見保來儒士發回原籍許令本處鄉試照例出身今後教官俱於副榜舉人三十歲以上者選除庶幾學校得人而人才有所造就若山林中果有隱居行義不求聞達年四十以

上學識卓異之人須方面府州縣官公同舉保風憲覆實送部嚴加考驗然後錄用如有不實罪坐舉主

題用賢事

商輅

臣切照見任春坊司直郎林聰原籍福建人由正統四年進士歷任刑科都給事中陞今職本官學識優長操持端潔存心公正遇事敢言先在刑科衆皆推服今任司直郎固是美職但所任政務頗簡未免以有用之才置於閑散之地况今吏科都給事中張某久病不出如蒙乞降

特旨着林聰兼吏科都給事中管事如此則  
恩出於朝廷非惟本官益竭忠誠勉圖報稱凡有  
言責者亦皆聞風感激各思自效矣且今春坊官  
員多係翰林等衙門兼職林聰原係都給事中今  
令以司直郎兼之俸祿無增品秩仍舊於事體無  
損於政務有益且使中外人聞之皆謂

陛下誠於求言善於用賢所謂用一人而千萬人  
悅豈不美哉臣職居近密偶有所見不敢緘默

覆給事中韓鼎公選法奏狀 王恕

文選清吏司案呈奉本部送禮科抄出禮科給事

中韓鼎題云云等因具題奉

聖旨該衙門看了來說 欽此抄出送司案呈到  
部着給事中韓鼎所言考選監生出論有請客之  
名要行出判語及令親供一節臣等議得考監生  
出論題觀其作文以第高下此舊規也奈何所考  
監生賢愚不一能者依經傍註一篇可成不能者  
閣筆疑眸一辭莫措却乃不依本題別寫他作故  
人謂之請客此等之人固不當取但人才難得是  
以或觀其寫字或觀其人物而次第之以備下僚  
末職之用未嘗有棄才也若與能者出論題與不



能者出判語是使學者皆記判語而不學作文非法之善也合無今後考選監生聽本部出題取其文理平順者爲一等文理頗通者爲二等文理不通若寫字人物有一可取姑以入選如此則考選有方而高低自別矣其言各部主事等官有歷俸三年二年未及二年而驟陞者有七年八年或九年將滿而纔陞者拘於各部似乎不公要照郎中林壘等調改復除事例不分本部別部以歷俸年深者陞用一節臣等查得往者各部缺官若本部有相應人員就於本部陞用無相應人員方於別

部陞調此見行事例若戶部郎中林壘員外郎吳裕調吏部是也若但以歷俸年深爲主不分清濁勤惰一槩更調如歲貢例不無賢否混淆紛更太甚合無今後轉陞官員如其部缺郎中員外郎先儘本部年深相應員外郎主事銓補如無相應者則於別部年深相應員外郎主事調補如此則選法公而人心勸矣其言旌異推舉有舉取未成而問發爲民者有旌異方畢而問發充軍者有行取到部調除原職者要行連坐舉主一節所言有理合無今後在外官員果有廉能公正政蹟卓異聽

巡撫巡按等官從公旌舉各注舉主於旌舉官員之下日後犯贓連坐舉主如是庶幾舉能其官用得其人矣緣係陳言公選法及奉

欽依該衙門看了來說事理未敢擅便具題奉聖旨是欽此

議都御史邊鏞保治奏狀弘治元年王恕

文選清吏司案呈奉本部送禮部咨該都察院左副都御史邊鏞奏云云等因具本奏奉

聖旨這本所言該衙門看了來說欽此欽遵抄單移咨送司案呈到部當本官所言任賢以遠奸

諛等六事逐一着議明白各關前件伏望

聖明裁處緣係節該奉欽依該衙門看了來說

事理未敢擅便具題奉

聖旨准議欽此

一議得君子小人迭為消長君子進則小人退小

人進則君子退自古未有用君子而不治用小

人而不亂者也且執德守義正直中和者君子

也巧言令色便僻側媚者小人也但君子難親

而易踈小人難踈而易親

陛下新服厥命固嘗用君子而退小人矣今都

御史邊鏞拳拳以是爲言者第恐君子雖用而信任不專使小人得以間之終不能成其治小人雖退而屏逐不遠復將夤緣復進終有以害其政夫知其爲君子而任之則不必致疑知其爲小人而去之則不可復用如是則止人立朝而萬邦咸休矣

一議得都御史邊鏞所言納諫以廣言路一節誠人君爲政第一事也

陛下嗣位之初嘉言無不納善政無不舉弊政無不革臣民無不悅服若李文祥之奏疏其意

雖忠直其言則逆耳

陛下畧不加罪但除事繁縣佐使之歷練以成就之恩莫大焉不知者以爲貶李文祥以箝言者之口此邊鏞所以爲

陛下言之合無准其所言行取李文祥前來照依甲等資格改除在京事繁衙門使之歷練以成其德器一釋衆人之惑一全納諫之名不亦善乎

一議得勸懲者人君之大柄所以散動人心而警懼天下者也今都御史邊鏞所言別善惡以昭

勸懲一事誠爲有理臣等又聞古人有言賞必自踈遠始罰必自貴近始賞自踈遠則賞一人而千萬人懼而千萬人勸罰自貴近則罰一人而千萬人懼陛下若納邊鏞之言用古人賞罰之法則善無不勸惡無不懲而天下治矣

一議得名器者人君之至寶所以彰有德而別有能若不擇其人而授之則奔競之風起而廉耻掃地矣其何以爲國乎

陛下新服厥命擯斥奸佞惟賢是用固未嘗以名器假人矣今都御史邊鏞猶以是爲言者何

恐寡廉鮮耻之人尚在投間抵隙之言未絕惟願

陛下始終此心始終此政杜絕先容之私言自無倖進之妄人夫如是又何患名器之不重而朝廷之不尊乎

一議得都御史邊鏞所言乞

勅巡撫巡按等官嚴加訪察守令務致的實名著循良者指實具聞即便擢用而無拘乎資格政果貪酷者據實訊問即便罷黜而無待於朝覲其守令之中尤有循良之最者書於御屏

或錫車服以彰其能一節查得節次詔書與夫  
巡撫都御史 勅諭并本部奏行事理其於守  
令之賢否俱有旌擢黜退之典今邊鏞復以是  
言之者蓋是巡撫巡按等官奉行未至合無通  
行各處巡撫巡按官查照節次

詔書并 勅諭及本部奏行事理嚴加訪察知  
府知州知縣等官某人廉能公正某人貪酷害  
民某人罷軟無為某人年多有疾當旌擢者具  
其政蹟奏聞當獎勸者畧為獎勸當拏問者就  
行拏問當黜退者就行黜退當致仕者勒令致

仕務在至公不許顛倒是非致紊勸懲之道自  
取失職之譏

一看得都御史邊鏞所言

陛下於文武大臣之中留神俯察其才能性行  
孰可宰銓衡孰可總風紀孰可為大將孰可為  
副參孰可撫安一方孰可守鎮要地既即事以  
驗其才再因才以授其職不因瑕以掩瑜務舍  
短而求長一節誠為簡法但自正統年間以來  
每日止設一朝或兩朝每一朝臣下進見說事  
不過片時

聖主雖聰明豈能盡識盡察不過寄聰明於左右之人大臣於左右之人相見者不多左右之人亦豈能盡察識諸大臣之賢否亦不過寄聰明於門客門客之識見未必盡合公論或得之毀譽之言或出於好惡之私是以以直爲枉以枉爲直者多欲察識之得其真必須  
陛下日御便殿宣召諸大臣與之講論治道謀議政事或令轉對或閱其章奏如此非惟可以識大臣而隨才任事可以啓沃  
聖心日進於高明矣

論王府保舉官員奏狀

弘治元年

王恕

文選清吏司案呈奉本部送內府抄出淮王奏云云等因具奏奉

聖旨吏部知道欽此欽遵抄出送司查得劉奎某府州縣人由生員成化二十一年七月遇例納銀送南京國子監放回依親讀書至今方纔二年有餘及查本部聽選監生自入監歷事以來守候十八九年方得除授今劉奎之爲監生未及三年輒便希求保舉圖任伴讀若准所保不無遂其僥倖之計阻滯年深之人及查得天下王府二十五處

額設官員不爲不多除良鑿典膳典樂外其餘俱  
係常選官員近年以來遇有缺員往往奏保或稱  
妃兄妃弟或稱儀賓親屬與九相熟之人不論可  
否一槩奏保任用實壞選法阻滯常選之人案呈  
倉無今後 王府官有缺該長史司便呈報各該  
布政司轉達本部照缺於監生吏員內相應人員  
銓補不許仍前奏保攬越仕籍阻壞選法如此則  
奔競者不得倖進守正者免其嗟怨仍行各該布  
政司啓 王知會緣係乞 恩保舉官員及奉  
欽依吏部知道事理未敢擅便具題奉 王

聖旨是欽此

議僉事林淮願就教職以便養親奏狀

弘治元年

文選清吏司案呈奉本部送吏科抄出雲南按察  
司僉事林淮奏云云等因奉

聖旨吏部知道欽此欽遵抄出送司案呈到部看  
林淮奏稱雲南路遠母老不堪就養辭官則家貧  
難供朝夕乞要授以本處或附近府縣學教授教  
諭以便養母一節情實可矜况本官辭尊居卑辭  
富居貧豈得已哉合無俯順其情授以附近地方  
府學教授職事令其到任以便養親親終仍除僉

事職事一以慰本官母子之情一以爲臣下忠孝之勸等因具題奉

聖旨是欽此欽遵今查得直隸常州府儒學見缺教授一員欲遵奉 欽依事理將林淮准除授常州府儒學教授順賚文憑令其到任管事未敢擅便具題奉

聖旨是欽此

選用新舊進士兼懲窺避奏狀弘治元年

照得舊例進士登科之後自本年至第三年第二甲進士內則選主事等官外則選知州第三甲進

士內則選評事行人等官外則選推官知縣至第四年不分二甲三甲俱選主事等項京職以其辦事年久故也成化十二年取進士三百名存留一百名在各衙門辦事餘皆放回依親讀書已經二次行取除已到選用其見在外尚有四十餘員未到即今在外缺知縣推官共七十餘員欲將見在二十年舊進士擬除補缺緣係舊進士去年已不選外任俱授京職今在舊進士比之先授京職者辦事聽選又多一年若選外任揆之人情實有不堪比之舊例亦不相同合無將二十年見在舊進



士照例挨次俱除京職將二十三年第三甲新進士除在外知縣推官并在內行人待舊進士選盡却將第二甲新進士於內外相應員缺內相兼選用所據舊進士除到外其行取不到者似有躲避外選情弊合無除丁憂事故外其餘無故至今不到以後到部之日俱除外任庶幾銓法無私人心有警緣是選用新舊進士事理未敢擅便具題奉聖旨是欽此

議左都御史馬文升陳言裨益治道奏狀  
文選清吏司案呈奉本部送准禮部咨儀制清吏

司案呈奉本部送禮科抄出都察院左都御史馬文升奏云云等因奏奉

聖旨這本所言多切時弊該衙門便着了來說欽此欽遵移咨送司案呈到部看得馬文升所奏選賢能以任風憲等四事誠如

聖諭謹議開坐前件伏乞

聖裁緣係節奉欽依該衙門便着了來說事理未敢擅便具題奉

聖旨准議欽此

一查得舊例御史員缺於各衙門辦事半年以上

進士及本部聽選舉人監生并行人博士推官  
知縣教官內選補至成化六年以後拘於正統  
年間頒降憲綱新進初仕不預選任近該南京  
禮部精膳清吏司郎中李諒陳言本部議擬今  
後選用御史於在京各衙門辦事進士與夫曾  
經一考稱職行人博士及進士舉人出身推官  
知縣內選年三十以上五十以下人物端整言  
語正當操行廉潔才識優長者送都察院理刑  
半年滿日聽本院考察各註考語連人送部請  
曉刑名堪任御史者奏

請照缺選補但知縣推官係在外官員訪查未  
詳合無通行各處巡撫都御史巡按御史各於  
按屬進士舉人出身知縣推官內從公推舉如  
前相應之人備開脚色政績具奏以憑遇缺行  
取兼進士行人博士選送理刑不許舉非其人  
已經題准欽遵外今馬文升又奏前因誠爲  
選用風憲之良法但恐遇有御史缺多六年以  
上知縣二年以上進士內相應之人數少必待  
其有然後選用不無悞事合無通行各處巡撫  
都御史巡按御史并布按二司官各於所屬曾

經一考稱職進士舉人出身推官知縣內推舉  
年三十以上五十以下人物端莊言語正當操  
行廉潔才識優長者備開脚色政蹟具奏藉記  
在部遇有御史員缺先儘六年以上行取前來  
相兼二年以上進士并一考行人博士選送理  
刑半年滿日聽本院考察各註考語連人送部  
選用如無相應六年以上知縣推官二年以上  
進士仍依本部議擬奏准事例於半年以上進  
士曾經一考稱職推官知縣內選用如此則選  
用亦可以得人風憲不至於久缺矣

一查得舊例按察司官有缺於法司屬官內推補  
其知府同知推官知縣有原係法司出身及曾  
在法司辦事者亦得推補如蘇州府知府林鶚  
推補江西按察使寶抵縣知縣葉淇推補廣西  
僉事是已至於斷事理問推官有缺本部臨時  
斟酌選用而法司辦事進士歷事舉人監生居  
多但進士及舉人監生俱是挨次取選而舉人  
監生又係臨選考校或前或後人缺有不相當  
難以一一照缺對人除補今馬文升奏稱前因  
合無今後按察官有缺先儘法司相應屬官推

補其知府同知等官果有諳曉刑名政聲卓異者亦得量才推舉斷事理問推官有缺先儘法司辦事進士歷事舉人監生除補次及相應人員所言不許差占斷事理問推官有慢問刑一節係見行事例但各該官司奉行未至或遇急切公務往往差遣委的有慢問刑合無行都察院轉行各處巡撫巡按及布按二司今後不分大小公務俱不許違例差遣斷事理問推官妨慢問刑如此則司刑得人刑不枉濫矣

一查得舊例知州知縣缺少本部於當選內將該

選進士監生及該陞官員除補如遇缺多照依大學士李賢奏准事例將聽選監生舉人不分年月遠近揀選考補近該成化二十三年朝覲考察黜退天下知州知縣數多本年四月內於常選外將聽選舉人監生照例揀選考試除補知州知縣共一百九十五員給憑赴任去訖餘有員缺常選陸續除補但州縣數多隨補隨缺未能得完人民繁夥錢糧浩大去處知州知縣實難其人本部已經題准將成化二十三年第三甲進士取選兼同舉人監生及該升官員

通行除補外候員缺數多仍照前例揀選除補  
所言四川雲南廣西福建路途險遠若待缺到  
除官不無太遲要行先期除官頂補固爲有理  
若不查勘應否一槩扣缺除補恐前官中間亦  
有事故一年之上未滿後官將帶家小守候日  
久不得支俸管事衣食不足求其不爲奸民猾  
吏所餌斯亦難矣合無通行巡撫巡按官將所  
屬州縣正官二考之上九年將滿者按季查奏  
開具各官歷俸及該滿年月以憑斟酌遠近除  
補及將新除官員訪察敢有過家留連不卽到

任者查照成化六年三月內本部奏准選授外  
任官員過違憑限半年之上不到任者雖有中  
途患帖不准照例問罪過一年之上者不許到  
任起送革職爲民事例施行若在中途及任所  
事故去任者所在官司并原任衙門即時具由  
通行合于上司及徑申本部知會以憑作缺銓  
補其言布政使按察使知府所係甚大尤宜慎  
選一節本部遇有前項正官員缺未嘗不廣詢  
博訪慎擇其人二司正官每員推舉二員請  
旨簡命一員知府亦精擇一員請

旨陞用自今以後益當盡心推選以求無負委任如此則正官亦可得人廢政不致廢墜矣

一查得舊例兩京各衙門屬官三年六年九年考滿先從本衙門堂上官考覈送都察院覆考又送本部覆考從而黜陟以示勸懲近年各司因循苟且所出考語不辨淑慝虛應故事及其覆考得實其平常官員輒便造謗摭拾以致考覈不行無所勸懲誠如左都御史馬文升所言合無通行兩京各衙門知會今後屬官考滿堂上官務秉至公詢訪得實出與考語善善惡惡定

爲確論送都察院并本部覆考如原來考語平稱得當續出考語不嫌雷同若有不當聽覆考官從公考覈其被考平常之人敢有仍前造謗摭拾許御史等官指實劾奏拏問平常者降調外任有賊者罷黜爲民若覆考挾私不公一體治罪其有前考平常後考中間能深自懲艾勉於爲善者亦宜書稱前考稱職後考中間放肆改節者亦書平常以憑黜陟如此則勸懲無私而官僚知儆矣

議戶給事中王珣陳言時務奏狀 王恕

文選清吏司案呈奉本部送准禮部咨戶科右給事中王珣奏云云等因具奏奉

聖旨該衙門知道欽此欽遵抄出移咨送司案呈到部查得見行事例取選考試舉人監生文理平順者多相應除授府佐知州知縣等官職事歲貢應例監生文理平順者少相應除以縣丞主簿等官職事但歲貢應例監生視舉人監生數多上選之時不得均勻舉人監生有接連五七十名者亦有百十人中舉人不上十數名者若前項府佐州縣正官缺多舉人該選者數少未免將歲貢應例

監生除以府佐州縣正官若前項缺少舉人該選者數多不免將舉人除授縣丞主簿等官例此而行似未停當及查得成化十五年考選南監監生余紹夔等止百人中有一百八十二人俱是舉人若欲一例取選一時豈有許多府佐知州知縣不無亦選縣丞主簿等項職事未免有枉才小用之誚今右給事中王珣要將舉人遴選另置小簿遇州縣正官府佐二員缺挨次銓補似為有理但歲貢應例監生內亦有可用之人若將舉人另置一簿不惟立法太拘抑恐起人爭訟况前項選簿資次已

定相傳以遠遽難更動合無將聽選舉人監生照缺斟酌取用如相應員缺數多則量爲揀選多取幾人相應員缺數少則少取幾人餘者存留以待下選所取舉人與同歲貢應例監生一體考試其歲貢應例監生若有文理平順考在優等者亦授以府佐州縣正官舉人或文理不通考在中下亦以縣佐等項職事擬除如此庶使選法公而得器使之宜人心平而無咨嗟之聲緣奉 欽依該衙門知道事理未敢擅便具題奉 聖旨是欽此

議給事中林廷玉陳言翊奏狀

弘治元年

王恕

文選清吏司案呈奉本部送吏科抄出吏科給事中林廷玉題云云等因具題節該奉

聖旨這本所言該衙門看了來說欽此欽遵抄出送司案呈到部除明賞罰以振軍旅六事係戶兵等部掌行外今將本部合行革宿弊以清吏治等四事逐一議擬各開前件伏乞

聖明裁處緣係節奉 欽依該衙門看了來說事理未敢擅便具題奉 聖旨准議欽此



一查得成化十四年該辦事吏吳鵬奏稱近年以來有等無藉之徒遇該役滿指以清卷爲由潛住公廨營謀聽缺農民或考退生員頂補希求賄賂要銀一百五十兩名頂頭房錢設有貧難無錢者逼迫無柰儘將產業變賣或揭借錢財轉數出與頂頭以致迤相仿倣習以爲常此等之徒着役之後甚至壞法害民以償私債迨堪充無碍之人懼法不服出銀者反被捏造過惡赴堂執稟官不知情就行黜退若此之類不可枚舉乞行禁約今後吏典役滿即將見行文卷

交與同房書典當日起送出司如再托故延住取討頂頭房錢者通將受財并出錢過付之人各論以枉法贓罪未行遵守本部已經議擬題准通行禁約去後今給事中林廷玉又題前因合無准其所言通行內外大小衙門如遇叅克吏典該管官員務要嚴加禁約隨用新叅吏典叅克替役不許舊役吏典夤緣交通索取頂頭錢銀敢有不遵仍蹈前非事發與者受者及過付之人俱依律究治其該管官員知而故縱一體治罪在內令錦衣衛巡捕官校嚴加緝訪在

外聽巡按御史糾察如此則宿弊革而吏治清矣

一看得給事中林廷玉題稱近來納粟監生數多彼既以財出身得官豈不拔本生民被其魚肉要預先立爲上中下三等於臨選之時吏部出題嚴加考試文理通暢者爲上文理稍通寫字端楷非請客者爲中不諳文理寫字粗拙請客者爲下上中二等量其高下與科貢一體選用下等者填註衙門職名令其冠帶閑住行移國子監及天下學校省諭各生知會使知各加勉

勵奮志進學以收後效如此庶幾臨時不悞士子而將來官亦得人矣

一看得給事中林廷玉題稱教官陞用太拘以致豪傑不就貢途充位生員無所取效要將天下教官今後俱於舉人除授六年有功蹟照例會試九年考滿若無功蹟依舊銓選但有功蹟者俱量陞有司相應職事其歲貢出身之人不必除授教職一節除六年有功蹟許令會試九年有功蹟者量除有司職事俱係見行事例別無定奪查得天下教官五千有餘逐年取中副榜

舉人雖有千餘其間有例不該就教職者十有六七該就教職者不過二三百名豈能完補前項教職員缺其言九年無功蹟者依舊銓選有功蹟者俱量除有司相應職事切緣

祖宗舊制教授舉人五名該陞舉人四名三名本等用舉人二名以下降學正舉人全無考通經降訓導學正舉人三名該陞舉人二名本等用舉人一名降訓導舉人全無考通經降訓導教諭舉人二名該陞舉人一名本等用舉人全無考通經降訓導訓導舉人一名該陞舉人全

無考通經降邊遠學校訓導其教授以下若不通經俱降河泊所等官百有餘年率用此道若將無功蹟教官依舊銓選不惟有碍舊制抑且人心無警且各王府審理紀善伴讀教授及國子監博士助教等官各府州衛儒學教授舊制俱該九年考滿有功蹟教官陞用若將前項教官俱量除有司職事第恐各王府并國子監前項教職員缺無從銓補况教官中間雖有功蹟而年貌才調未必皆堪任有司之職合無今後教官九年考滿仍遵

舊制第爲陞降其該陞之中學行超越者授以知縣其次授以博士等官歲貢等項監生願就教職者本部及翰林院嚴加考試務要精通三場者授以訓導其文理生澁者不得濫等其間如此則教官亦可以得人生員不至於無教矣一查得成化二十一年該本部題爲缺官事當將刑科都給事中盧瑀陞除湖廣長沙府通判給事中秦昇陞除四川順慶府廣安州同知工科給事中童祝陞除湖廣武昌府興國州同知及查得成化二十二年爲急缺紗綾紙劄事將御

史劉俊調除福建邵武府光澤縣知縣訖近該本部題內開給事中御史調外任該陞一級降外任該對品調任者有相應員缺就行除授知縣同知官職事無相應員缺者陞俸一級仍令照舊管事其前項兩京給事中御史并文職奉特旨調任降級者內果有才識超卓遇有相應員缺陸續量才舉用已將劉俊陞俸一級仍舊管事候有相應員缺量才舉用外爲照府通判盧瑀州同知秦昇童祝又有原任禮科都給事中蕭顯陞除貴州鎮寧州同知浙江道御史汪

奎陞除四川夔州府通判俱係先年陞用官員  
比之因事降調者不同以此未及舉用今給事  
申林廷玉言盧瑀童祝秦昇雖係陞遷但當時  
欲斥逐而難爲名故假此以陰寓意耳要將各  
官量爲陞用合無准其所言將各官并成實蕭  
顯汪奎仍照本部題 在事例再行訪察如果  
才識超卓遇缺量才陸續舉用如此庶幾屈者  
以伸而下無遺才矣

本陳言輔治奏狀

王恕

今年閏正月臣以年老奏乞休致奉

聖旨卿朝廷老臣未可輕退宜勉副任用事有當  
言的盡心來說毋再固辭欽此臣有以見

陛下不欲臣去者非徒欲富貴臣也蓋欲臣竭耳  
目之所見聞盡此心以匡輔聖政也近因痢疾陳  
乞容臣調理將印命侍郎署管奉

聖旨准卿調理印照舊掌臣又有以見

陛下眷愛之專也有君如是何忍負之伏觀

祖訓條章內府各監局等衙門內官俱有定員各  
有職掌洪武永樂年間未嘗額外濫設其太監等  
官非歷練老成雖有聰明才俊亦不輕授近年以

來則不然矣前者

陛下將內宮論年逆降蓋矯往年濫陞之弊欲復祖宗之舊制誠是也臣於病中風聞近日又陞一起內官其數頗多不知是前日逆降者不知另是一起也前既以爲濫而逆降之今何不以爲濫而復陞之似乎不可舉措如此其何以示天下

陛下嗣位之初人心歸向如古之二帝三王本朝

太祖太宗復見於今日莫不稱頌而愛戴之蓋

聞

陛下在青宮時存心正大不喜聲色不貴貨利及登寶位又罷貢獻織造屏去一應珍竒玩好之物治近習蠹國亂政邪術欺君罔上之罪并逐刺麻番僧法王佛子國師革罷傳奉冗員追回濫賞莊田蟒衣等項裁抑奢侈奔競凡此數事皆壞名器損國體傷民財臣民所不欲而不能革非一日矣

陛下一旦而盡革之此天下臣民所以稱頌而愛戴之也夫何未久而又濫陞內官如此若復濫賞莊田蟒衣將見前數事不數年復如舊矣歎天下

臣民稱頌而愛戴之如今日後不可得此天命去  
就人心離合之機也可不慎歟况今北虜在邊災  
異迭見此正君臣上下同加修省之時而國政如  
此其何以服遠人而弭天變伏望  
陛下自今伊始於出入起居之時發號施令之際  
務要惟精惟一允執厥中遠宗堯舜之道近守  
祖宗之法決不可為巧言所惑蹈襲前事上拂天  
意下失人心而為社稷憂臣誠激於中詞不能婉  
干冒實文又冒首禍無益飛去一類  
天威無任戰慄隕越之至等因具本奏奉旨休又

聖旨這起內官隨侍春宮年久因遇節日各量陞  
一級了罷欽此

覆大理寺右寺丞楊澄鑒別大臣奏狀

弘治元年

文選清吏司案呈奉本部送准禮部咨禮科抄出  
大理寺右寺丞楊澄奏云云等因具奉

聖旨這本所言該衙門看了來說欽此欽遵抄出  
將專委任以禮大臣一事移咨送司案呈到部臣  
等看得楊澄所言乞要  
陛下將內閣并在廷文武大臣一一  
重瞳鑒別果有年力衰憊庸庸保祿不堪任事者

以禮罷去其老於闕歷明達事故可備顧問計大  
 事決大疑者亦宜曲力庇覆而優容之少賜  
 宣召而寵異之勿因小嫌而阻其志勿以小過而  
 挫其節一節經傳載之而有成說歷代行之而致  
 成效非無稽之言弗詢之謀可比也然所以體而  
 行之在人君而非臣下之所敢言也伏乞  
 陛下因楊澄之請將見任大臣再加鑒別可者任  
 之其不可者罷去之既任之將以計大事也則小  
 嫌宜在所畧將以決大疑也則小過宜在所容人  
 言當恤報私仇而陷排之者不可不察衆論可采

執偏見而非毀之者不可不辨機密之事賜以手  
 詔激切之情許之面陳必如朱熹所謂任則勿疑  
 疑則勿任此聖君賢相所以誠意交孚兩盡其道  
 而以共成正大光明之業也書曰任賢勿貳去邪  
 勿疑願

陛下大書於座右時加省覽緣係陳言脩省及節  
 該奉 欽依該衙門看了來說事理未敢擅便具  
 題奉

聖旨是欽此

議太常寺缺官供祀奏狀

王恕



文選清吏司案呈奉本部送吏科抄出太常寺掌  
寺事太子少保禮部尚書劉岌等題云云等因具  
題奉

聖旨該部看了來說欽此欽遵抄出送司查得徐  
啓端原任司樂傳陞協律郎王福廣等一十三員  
俱由樂舞生傳陞協律郎等項官職成化二十三  
年九月該科道官陳言要將傳奉濫設官員通行  
查出罷歸原籍閑住等因節該奉  
聖旨是原有官陞職的三品四品降正從六品五  
品六品降正從八品七品以下降雜職樂舞生消

士出身的冠帶閑住都不用再求進用欽此欽遵  
外今該前因案呈到部看得具官劉岌等題稱本  
寺缺官供祀要將徐啓端仍復司樂其餘王福廣  
等月支食米聽候差委祭祀一節先因內外奔競  
無耻之徒夤緣梁芳等傳陞京職日積月累遂至  
千數百員費耗錢糧濫占皂隸不可勝紀互相交  
結以邪妨正又不可言三五年來名器大壞物議  
不平仰惟

皇上嗣位之初首罷傳陞官員朝野爲之改觀人  
心無不痛快迄今一年有餘事體方定奔競稍息

今劉岌等却要將徐啓端等復職食糧是爲傳陞  
官員立赤幟也若復用一人則數千百人皆相率  
而來豈勝煩擾豈不壞

朝廷清明之政失萬邦黎獻之心所言難在且三  
年一次致祭 岳鎮海瀆

歷代帝王俱遣樂舞生行禮若謂金山等處墳所  
四十五處祭祀官少不敷差遣照例差樂舞生行  
禮亦無不可何必開已閉之侍門引既退之小人  
然而此舉非真爲缺官供祀蓋是徐啓端夬免劉  
岌等假此爲名以求復進非惟啓端此弊端抑且故

違

詔旨所據徐啓端等俱合拏送法司明正其罪以  
爲傳陞降革再求進用者之戒劉岌等亦合有罪  
緣劉岌等俱係京堂上及京官奉 欽依着了來  
說事理未敢擅便具題奉

聖旨是徐啓端等本當拿問且都饒這遭劉岌等  
罷欽此

議徽王乞陞鈞州爲府奏狀

王恕

文選清吏司案呈奉本部送准戶部咨河南清吏  
司案呈在工部營繕清吏司手本奉本部送 內

府抄出 徽王稱名奏云云等因奏奉

聖旨該衙門看了來說欽此欽遵抄出送司照得  
改作衙門係隸別部掌行除稟堂外合用手本前  
去戶部該司呈堂施行等因到司案呈看得前項  
改陞衙門一節比與臨清縣陞州事體相同係隸  
別部掌管難以施行合就移咨徑自施行等因到  
部送司案呈看得徽王所奏除修築城池及改挑  
河道俱係工部掌管除行該部徑自施行外其稱  
分封寥落州治要將鈞州改陞為府治就於郭內  
添設一縣并前項有名州縣一體所轄一節臣等

體得 肅府見在陝西蘭州 藩府見在山西路

州 荆府見在湖廣蘄州 岷府見在湖廣武崗

州立國多者八九十年少者亦不下四五十年率

皆仍舊未嘗改為今 徽府要將鈞州改為府治

又要將汝州邠縣魯山寶豐商州許州襄城長葛

臨潁鄆城鈞州密縣新鄭縣一十二州縣改隸所

轄不惟異乎前四府仍舊之撰且啟前四府改為

之端况今各處災荒軍民凋弊欲興此役實非所

宜兼且州之與府於 王頗無所與改與不改於

王似無重輕以此言之不如仍舊貫之為善也臣

等愚見如此未知是否緣係 欽依該部看了來  
說事理未敢擅便伏乞 聖裁具題奉

聖旨是不必改陞還寫書與王知道欽此

會議僨運糧儲行移奏狀弘治二年 王恕

文選清吏司案呈奉本部送准禮部咨該本部等  
衙門題刑科抄出都察院左副都御史邊鏞等題  
湖廣道呈刑科抄出總督漕運兼巡撫鳳陽等處  
都察院左副都御史秦紘奏湖廣等處承宣布政  
使司呈蒙巡按湖廣監察御史姜洪批兌軍糧米  
本院節行會奏去訖布政司星馳差人咨稟淮南

總督漕運官尚早處治毋得臨期致誤 國用備  
申轉呈臣處照詳處置施行備呈得此臣查得淮  
安徐州臨清德州四處水次倉糧數少雖各該衛  
所運糧官軍行糧尚不勾用又况臣撫屬地方亦  
有災傷但於內酌量輕重那移鞅補今亦未完其  
湖廣布政司前項兌軍糧米無從措置除行本部  
布政司計處外為照各處巡撫都御史與巡按御  
史行事雖不相關而名分終難紊越每見各處巡  
按御史與巡撫都御史移文有令按屬衙門抄案  
轉達此於名分雖乖猶以敵體相待今看得御史

姜洪前項批詞玩其語意乃是以上司督臨屬官  
名分倒置如此顯是姜洪不諳大體如蒙乞  
勅都察院將御史姜洪拿問明正其罪以爲越禮  
犯分之戒及行令各處巡按御史今後凡與巡撫  
都御史有行仍照行移體式徑自具呈不許出案  
轉達庶使名分正而體統嚴等因具本該通政使  
司官奏奉

聖旨都察院知道欽此欽遵又該刑科叅看得監  
察御史姜洪批詞既曰星馳差人又曰咨稟其下  
文毋得致悞等語乃爲布政司而設今都御史秦

紘以此自認怒目不明輒便叅奏自傷大體事屬  
紛擾宜從抄出施行通抄具呈到院看得具官秦  
紘叅奏御史姜洪前項批詞云云一節已該刑科  
叅看得監察御史姜洪批詞云云事屬紛擾詳此  
叅詞姜洪似爲無罪難以提問及查得行移體式  
內止開各道御史及巡按御史呈都察院并無巡  
按御史具呈巡撫都御史詞語其巡按御史出案  
轉達巡撫都御史揆諸事體亦無妨碍今要徑自  
具呈行移體式既不該載亦難擅擬爲例所據都  
御史秦紘該刑科叅出前項紛擾情節合當查究

但本官近陞右都御史巡撫兩廣去訖伏乞  
聖明裁處緣秦紘係在京堂上官及奉欽依都察  
院知道事理未敢擅便具題奉  
聖旨這本係干名分大體禮部便會各部通政司  
大理寺堂上官從公看了來說欽此抄出到部會  
同吏部等衙門太子太保尚書等官王恕等查看  
得行移體式各道并巡按御史具呈都察院雖無  
巡按御史呈巡撫都御史之文緣巡撫都御史亦  
係本院堂上官相應具呈但在外巡按御史有具  
呈者有抄案轉行者今巡按湖廣監察御史姜洪

批詞布政司呈馳差人咨稟淮安總督漕運官尚  
早處置毋得臨期致誤 國用委的詞語欠遜有  
失大體及刑科并都察院叅奏都御史秦紘自傷  
大體合當查究等詞不無偏向俱各有罪所據御  
史姜洪刑科經該官都察院僉書官吏通該查究  
提問合無今後巡按御史事與巡撫都御史相關  
者仍照行移體式一體具呈庶幾名分攸存體統  
不紊緣事內干碍在京堂上官并京官及節該奉  
欽依禮部便會官從公看了來說事理未敢擅便  
具題奉

聖旨是姜洪批詞不遜有失大體難居風憲對品  
調外任刑科都察院經該僉書官吏偏向不公本  
當提問且饒這遭各罰俸糧一箇月欽此欽遵擬  
合通行除外合行就移咨欽遵施行等因送司案  
呈到部看得御史姜洪係正七品今對品調外任  
該除在外正七品知縣職事查得山西平陽府解  
州夏縣見缺知縣一員欲將姜洪調補前缺順齋  
文憑令其就彼到任管事未敢擅便具題奉  
聖旨是欽此

皇明名臣經濟錄卷十六

Blank page with a faint blue grid pattern, likely a ledger or account book page.



